

26 OCT 1998

Komanwel-Anyaku

KOMANWEL AKAN TERUS MEMBINA DEMOKARASI, KATA CHIEF ANYAOKU

KUALA LUMPUR, 26 Okt (Bernama) --Komanwel di alaf yang akan datang akan terus memberikan tumpuan untuk membina demokrasi, kerajaan yang baik dan berusaha bagi pembangunan ekonomi mampan, kata Ketua Setiausahaanya Chief Emeka Anyaoku hari ini.

Beliau bagaimanapun berkata, Komanwel akan juga menghadapi isu baru dan cabaran, seperti pemusnahan alam semula jadi atau jenayah antarabangsa, berikutan peningkatan masalah di serata dunia yang memerlukan penyelesaian global.

"Memandang ke hadapan, sumbangan yang dibuat Komanwel terhadap tolak ansur dan persefahaman bukan hanya khidmat kepada anggotanya, tetapi juga kepada masyarakat antarabangsa," katanya dalam ucapan utama "Komanwel pada 50" pada persidangan Dwitahunan Kesatuan Akhbar Komanwel di sini.

Persidangan empat hari itu, yang bermula hari ini dirasmikan Perdana Menteri Datuk Seri Dr Mahathir Mohamad.

Anyaku berkata Komanwel sebagai pembina jambatan antara masyarakat, negara dan rantau, pada semua peringkat pembangunan, boleh menjadi contoh untuk diikuti oleh yang lain.

Anyaku, dalam ucapannya memberikan sejarah ringkas pembentukan Komanwel dan juga kemajuan semasa pertubuhan itu, yang telah diwujudkan pada bulan April 1949.

Pembentukan Komanwel telah diasaskan oleh perdana menteri dari Australia, Kanada, New Zealand, Afrika Selatan, India, Pakistan dan Ceylon (sekarang Sri Lanka) bersama dengan Britain.

"Dari mula lagi, kita adalah persatuan yang komited kepada keadilan masyarakat dan menentukan keperluan negara sendiri. Oleh yang demikian, kita menjadi pilihan bagi kebanyakan negara yang baru merdeka.

Beliau berkata kejayaan Komanwel yang paling berinovatif, yang digunakan oleh 40 negara, ialah pakej perisian komputer untuk menguruskan hutang luar, kadar faedah dan menunjukkan kadar faedah yang dapat dijimatkan dengan pembiayaan semula pinjaman.

Komanwel dengan pengalamannya untuk memahami kepelbagaian, dapat dijadikan contoh dari segi kerjasama dan pembangunan bagi dunia menuju ke alaf baru, katanya.

--BERNAMA

RAZ RI